



Komunikadu Imprensa

07 Setembru 2012

Tribunál Distrital Díli kontinua julga kazu Maus Tratus ba Kónjuje

Iha loron 05 Setembru 2012, Tribunál Distrital Díli halo prosesu julgamentu ba kazu maus tratus ba kónjuje ne'ebé rejistu ho Numeru Prosesu 328/TDD/2012. Kazu ne'e involve arguidu JK hasoru lezada JMP ne'ebé nu'udar nia kónjuje. Insidente ne'e akontese iha sira nia uma iha areia Delta 4 Komoro, Díli, iha 6 Agostu 2011.

Julgamentu ne'e prejide husi juiz kolektivu ne'ebé kompostu husi Dr. Jose Maria de Araújo, Edite Palmira no Antonio Gomes (juiz internasionál). Ministériu Públiku reprezenta husi Dr. Jose Landim (prokurador internasionál) no arguidu hetan assistensia legál husi Dr. Jaime Leite (Defensor Publiku Internasionál)

Kazu krime violénsia doméstika kontinua ass mesmu iha ona Lei Kontra Violénsia Doméstika, tanbá ne'e JSMP enkoraza autór judisiáriu sira atu fo atensaun seriu no aplika pena ne'ebé aproriadu ba kazu violénsia doméstika sira, haktuir Diretór Ezekutivu JSMP Luis de Oliveira Sampaio.

Bázeia ba akuzasaun husi Ministériu Públiku nian haktuir katak iha loron 6 Agostu 2011 mosu dezintendimentu entre arguidu no lezada iha sira nia uma hela fatin iha areia Delta 4 Komoro Díli.

Aktu ne'e akontese tanbá lezada ba halo tratamentu tradisionál ba nia kolega ne'ebé moras defisiensi fiziku. Tanbá arguidu hein kleur maibe lezada seidak fila, arguidu telefone no wainhira lezada to'o-mai arguidu nervouju no dudu lezada ba parede, terror, insulta no silu lezada nia liman los to tohar. Tanbá aktu ne'e, lezada tenke hetan tratamentu iha Hospital Nasional Guido Valadares (HNGV) Díli. Bázeia ba faktus hirak ne'e parte Ministériu Públiku akuza arguidu ho artigu 154 Kódigu Penál konabá maus tratus ba kónjuje no konjuga ho Lei Kontra Violénsia Doméstika.

Prosesu julgamentu ba rona depoimentu husi testemuña sira sei hala'o fali iha 26 Setembru 2012 lorokraik.

Atu hetan imformasaun kompleitu kontaktu;

Luis de Oliveira Sampaio

Diretór Ezekutivu JSMP

Email:luis@jsmp.minihub.org

Tel. 3323883/77810637